

TEXARÕN JÕ KRĨ WÛR

Hapu Na Pawrô Jõ Kàhhôc

Ûhÿ, pê Pawrô pê Jeju jarkwa na memprar catêjê nõ. Ne pê Texarõn jõ krĩ kam Jeju na mehkwy jakrã mehkrĩ atajê wÿr, pom cu me hõ kàhhôc pijakrut cahyt itajê kujate. Na pê hapu na hõ kàhhôc ita japry pê **Texarõn Jõ Krĩ Kam Jeju Na Mehkwy Jakrã Wÿr, Hapu Na Pawrô Jõ Kàhhôc** (2 Texarõn).

Ne Pawrô te Jeju to amji mã mehhimpej to me ipa, cwÿrjapê rime cupê Pahpãm tekjê nare atajê ame to kêanre, mã cute me amji pupun xà kêanre to me amji pupun. Ne hõ kàhhôc ita kam, Pawrô te me cumãcute amji mã Jeju to mehhimpej jicu nare na me cumã harên. Ne hanea ne cute me cumã pjê jamre xà caxuw, jũ caxuw hacpÿ ne Jeju wrÿc na me cumã harên.

Pê Pawrô hipêr me cumã amji jarê

¹ Ûhÿ, Jeju kam me ikjêjê, pom ca Texarõn jõ krĩ kam me apa itajê, ipê Pawrô, wa ite me pahtõ Xira me, me pahtõ Timot me, me awÿr mehhôc. Por me apê me pajõ Inxũ Catipê Pahpãm me, me pajõ Pahhiti pê Jeju tekjê na, came apa atajê wÿr ite mehhôc.

² Ne wa itÿj me pajõ Inxũ Cati pêPahpãm me, me pajõ Pahhiti pê Jeju mã me anaicakôc to ipa, quê me ato impej to ipa, ne me amã meacaxwãm pê me acarĩcti jõr to ipa.

Pê mehkwȳ pyrên Pawrô hakry

1 Petrô 4.12-19

³ Me ikjêjê, me acwÿrjapêa ri me ijakry hyre nare. Cwÿrjapê ri me imã ijôtpê hân ne Pahpãm mã me acajrên to me ipa na to prãm ita na. Ampo na? Caampeaj kam Jeju to amji mã me ahimpej to me apa. Ne hanea ne ca ame ajpên kînti to me apa ita, hõtpê ihcunea name amã ipicamên to ipa, cwÿrjapê ri me apyrên me ijakrya to me ijakry.

⁴ Me imãa, ca catyt kam me amji to apijapar to me apa. Na wa ijôtpê Jeju na mehkwȳ kwÿ mã me akôt harên to ipa. Ne por me Pahpãm par nareatajê kam, ca me amji pupun xà kêanre to ame apa, mã ajteare mã, mehkwȳ ame acuré to me ipa cakrô, ca cormã amji to me gũcanâr to me apa, ne Jeju to amjimã me ahimpej to me apa. Hõ, ate amji kam me gapac xà impejti to ate amji to me apijapar xà itajê na, wa Jeju na mehkwȳ kwÿ mã me akôt harê.

⁵ Ne pom ca me kam me amji pupun xà kên itajêa to pê ramã Pahpãm ihcakôc, ne ahna harkwa ta. Ampo na? Pom me ate amji pupun xà kên itajêa, quê ha Pahpãmkrac ri himpej xà mã me acjêj xà caxuw me acũmpej.

⁶ Ne quê ha Pahpãm catyt kam ipa ata kam, nee to ihnôcupan nare, ne cute ame ato kên itajê to, tapanhanea ne ame to kêanre ne.

⁷ Ne me amãa quê ha me akôt xà gõ. Ne hanea ne me imã cugõ, pom hanea ne ite me amji pupun xà kêanre ita jahpan xà na.

Jeju te amji jaxàr xà

Quê ha xa mepajõ Pahhiti pê Jeju pu na cuhypôc pixêrti ata to ahpar mã mõi, cõjkwa kam Pahpãm mãmemprar catêjê carõt týtji atajê me.

⁸ Quê ha ajpên mõi ne cato, ne me cupê Pahpãm jahkre kêatre atajê kên mã ame curê. Por nee me Pahhiti pê Jeju pê me pahkritxwý jarên xà impejti atajê kam hapac narecatêjê to hanea ne apu mehkên mã me curê.

⁹ Ne mehkêanre itajê quê ha me pajõ Pahhiti carõt týtji ita pê ampýa mã amehcuhhê. Na quê ha jũ caxuw Pahpãm te ame to kên xà ata pê me cator nare.

¹⁰ Por Jeju te amji jaxàr xà jõ amcro ata na quê haitajê cunea apu hane. Ne amcro ata na, quê ha Jeju na mehkwy me cuprõ ne Jeju mãimpejti to mehcaôc. Ne por mehcuneaJeju to amji mã mehimpej, ne kam me hapac to meipa atajê, quê ha Jeju pejti ne catia na me hõmpu. Ne ate me hajýar, ca ha atýj cahê na me acuhhê. Ampo na? Ite meamã Jeju jarên pejti jarên, ca ate mempar cwýrjapê.

¹¹ Pahpãm te amji tekjêa na me ana hàhwýr. Ita cwýrjapê wa hõtpê Pahpãm mã me acajrên to ipa, mãr quê me atehcajpa, ca ate me amji to apijapar xãnõ kam me gakryti atajê nõ to, ca ha me amji to ajpa. Me amã catyt kam amji to meapijapar prãm, cwýrjapê wa hanea ne ahna ahwý, mãr quê carõt to me atehcajpa, ca catyt kam amji to me apijapar to me apa ita na. Ca Jeju to amji mã meahimpej kam, me gápên to me apa, ne ahna me ahwý, ate gápên xà itajê cunea to me ajpên ràn to me amõr xà caxuw, hicu xà wýr.

12 Ita na quê ha mehcunea apyrên ame pajõ Pahhiti pê Jeju japyr to mehcakôc pejti to me ipa. Ampo na? Cute me akam hâpên xà cunea impejti name hõmpun cwýrjapê. Ne quê ha mehcunea me apê hõ tekjê na me gahkre pej. Ne Pahpãm me, me pajõPahhiti pê Jeju mã me akĩnti, cwýrjapê ri hãn ne hõtpê me ato impej to me ipa.

2

Quê ha jũm kên hêj xi cati cato

1 Jowãw 2.18-19

¹ Ỹhỹ me ikjêjê, ita caxuw wa ha me amã hacpỹ ne Jeju cator, ne cute me pahto cuprõn xà to, hipêr ihmpej.

² Ne ihhêj ne jũmjê jàhtôa ne Jeju te amji jaxàr xà to amehhêj xi tome ipa. Ne ramã xwahna amcro ita cator na, ame harê. Ne wa me awy, ca nee ame kam gapac nare. Nãmri quê ha mehkwy me irĩat kam, cute me ampo pupun name amji jarê, nare, quê ha mehkwy Pahpãm te me cumã ihcakôc na me amji jarê, nare, quê hamehkwy ite me cumã ihkàhhôc ton na me ijarê, ca hanee me jũmjê itajê nõ kam gapacnare. Ne nee ate amempar xà ata to amji pê me gapac kêt to me apa nare, ne nee ame to amji jigêc rênto me apa nare, quê nee jũm me anõ mã ihhêj nare.

³ Quê ha Jeju jõ amcro catorxwýjrea na ampo ajkrut ne cato. Ita quê ha mam cato he. Quê ha me hàhtôa ne ame Pahpãm curê, ne cunaa mã amehcaca to amehcuhhê. Ne ihkôt cato ita, quê ha cupê me hirôa pê jũm kêanre ata. Por me

hirôa pê jũm kêanre ita quê ha jũ caxuw, amcro nõ na, ma ihkên catia pê ãhkãkãnti kam cuhy ata kam ihpým.

⁴ Quê ha amji to cati prãmte, ma apu Pahpãm caca, ne ma apu pahpãm cahàc krekà caca, mehcunea te amehkĩn ne mempar prãmte. Quê ha mehcunea jipy apu mõi, ne hanea ne ma Pahpãm tome amji kam hapac xà jũrkwa mã axà ne jỹ, ne me cumã cupêa Pahpãm na amji jarê.

⁵ He pê wa me acahê na ipa reria mã itýj me amã ampo itajê cunea jarên to ipa. Xà ca nee ampo itajê to ame amji japackre to ame apa nare?

⁶ Quê ha jũm kêanre ita jõamcroa kam ahtwý, quê ha ihtýj amji to ajpê. Ne por wýjrea na ramã jũm ipa ata, quê ha necute amji kam hapac xà ita na hamãr nare. Neramã ate me jũm ata jahkre pej.

⁷ Mã ramã cute amji kam hapac xà kêanre ita apu ihcahkũm to mõi. Ne ramã me to kên to mõi. Ne por ihkêanre ata, quê ha xa jũm ihkên têtema hiprõ ata ma tẽ, jakàn pê quê ha ihtýj ihkên itajê cunea ton to ipa.

⁸ Ne por me hirôa pê jũm kêanre ita quê ha ihtýj amji to ajpê, hõ amcro ata na. Ne por Pahhitipê Jeju te amji jaxàr xà ata kam, quê ha Jeju ihtýjhapkôc to ihcura. Ýhỹ, quê ha Jeju hàhcujro pràti ita to cato, me ajkaam, quê ha jũm kên ita hamre, Jeju jàhcujro cupate.

⁹ Quê ha jũ caxuw me hirôa pê jũm kên ita cator xà jõ amcro kam ahtwý, quê ha me pahcurê xwýn pêXatanaj cumã carôt týtji gõ, quê ha to amji to hipu, necato, cute mehcunea

mã ihhêj prãmte. Quê ha incaca xà to cute amji kam hapac xà cunea to me cumãn to ipa. Quê ha mehcunea, cute amji kam hapac xà cati na me hahkre pej.

¹⁰ Quê ha ampo pihho kên cunea ton to ipa, cute ihkôt me amji ton catêjê mã ihhêj xà na. Ne por cute ihkôt me amji ton catêjê atajê, quê ha me hamre. Ampo na? Nee cute me Pahpãm jũjarên xà ata na meamji caxàr nare, ne ma amehcaca, na quê ha me hamre. Quê ha cama tagna me amji capa na mã, quêha ihtỳj mehkên pê me amji pytà. Ne nee cute ahna me amji caxàr nare, cwỳrjapê quê ha me hamre.

¹¹⁻¹² Hõhõ, ita na quê ha Pahpãm cama me hamã, quêha me taa amji mã mehhêj. Hõ, cute me Pahpãm par nare atajê caxuw ri cuteamji kam hapac xà ita cumã. Ne por cute mehhêj xi kîn catêjê atajê, quê ha Pahpãm mehkên mã me cumê, quê ha mehkên mã me axà ne me hamre.

Pê Pahpãm me pahpytâr xà caxuw amji mã me pahcapi

Roman 8.28-30; 1 Texarõn 2.13; 5.23-24

¹³ Ỡhỹ me ikjêjê, wa itỳj Pahpãm mã me acajrên, ne cumã me apejti na me garên to prãm. Ampo na? He me pajõ Pahhiti mã me akîn cwỳrjapê. PêPahpãm mam ramã amji mã me acapi, meakên pê cute me ato cator xà caxuw, ne haneane Pahpãm Carõ Pejti te Pahpãm mã me acũmpej xà caxuw. Ne hanea ne ate Pahpãm jarkwa kôt me amji ton xà caxuw, Pahpãm te amji mã me acapi. Pahpãm te atajê cunea na amji mã me aton, cute me ato ihkwỳa xà caxuw.

¹⁴ Itajê cunea caxuw pê Pahpãm me ana ahwỳ. Pom pê wa me amã Jeju jarẽn pejti to harẽ ata caxuw, pê Pahpãm me ana ahwỳ. Ne hanea ne cumã me ate me pajõ Pahhiti pê Jeju Crixto cator xà jõ amcro jàhcujro pràti ata kam, cumã ame apa na me ato prãm.

¹⁵ Cwỳrjapê, ca me ikjêjê, me amji pyxwỳ, ne ahna meamji pyxwỳr tu. Ne pê wa me amã ijũjarẽn xà to awjarẽ atajê, ca ha amji mã me nõi to impeaj ne. Ne ma me to amji japackrea ne. Ne hanea ne me ijõ kàhhôc ita to me amji japackrea ne.

¹⁶ Ỳhỹ, me pajõ Pahhiti pê Jeju Crixto me Pahpãm pê me pajõ Inxũ Cati mã me pahkĩnti, mãhõtpê me pahto impejti to prãm. Cwỳrjapê ri me pamã me pahcarõt gõ, cu nee ame ampo kên cupa nare, mã ma Jeju jikaj na me pahtehcajpa, cu pahtỳj cormã me hikaj.

¹⁷ Cwỳrjapê wa Pahhiti pê Jeju na me ahwỳ, ne cumã me caa pit cajrẽn, ne hanea ne mePahpãm pê me pajõ Inxũ Cati mã me acajrẽn, quẽ me anacuhkõnre kam me amã hakam, ne me ato ihtỳj, ca me ampo pej pit jarẽ, ne me to.

3

Pahpãm mã me Pawrô cajrẽn xà Coroxo 4.2-4

¹ Ne ijõ kàhhôc ita jicu xà kam, wa ha meikjêjê me awỳ, ca Pahpãm mãme icajrẽn. Ne ahna me ahwỳ, mãr quẽ Pahhiti jarkwa itaihcahkũm to awjarêa ne ihcahkũm. Ne quẽ ha me hàhtôa mã

harkwa ita impeaj to impej, ahnaa mã meamã impejti he.

² Ne hanea ne Pahpãm mã me icajrën, quê mehkên atajê kaj na me ito ipa. Ca ramã me ate me hahkre pej, mã nee mehcunea Pahpãm jarkwa kam mehapac nare, ne nee amji mã me to ihmipej nare.

³ Mã me pajõ Pahhiti ihtÿj amji jarkwa na amji kampa. Quê ha me ato ihtÿj, neme pahcurê xwÿn pê ma me gamã, ne ma me apytà.

⁴ Me pajõ Pahhiti te ramã me imã me garën, cwÿrjapê wa ite ampo cunea to me amãn atajê na, wa itÿj ate kam me to acrà na amji mã me ato hane.

⁵ Ne wa itÿj cõjkwa kam Pahhiti na ahwÿ, quê me acaxwãam pê, me ana cuhkõnrecunea to ate me hahkre pej na me ato, ca me hahkre pej. Pahpãm mã me akĩnti, ne Jeju Crixto ri meamã me acarôt gõ, ate ihkõt me gũcanãr xà caxuw. Ita na wa me amã Pahpãm na ahwÿ.

*Me pahcunea jãpên xà pit
Epet 4.28; 1 Texarõn 4.9-12*

⁶ Ỳhÿ me ikjêjê, wa me pajõ Pahhiti pê Jeju Crixto jarkwa na me amã ijarkwa jirên to mõ. Ca ha mecaa me pahkjêjê te me xuwcacati atajê pê me amjito gũjawry to me apa. Por ma apu ite me ampo to hahkre xà caca atajê pê ca ampÿa mã ame apa.

⁷ Wa ite me amã ampo ton xà atajê na, ca me ipynã. Ne ramã ate me ton xà ita na me hahkre pej. Pê wa me akam ame ipa, ne nee ame xuwcaya to me ipa nare.

⁸ Pê wa nee ampo na jũm mã me ijàmjõr nare kam, cupê me ipyr nare. Pê wa quêt cama me apêa to me apê, ne wa me ijàpên xà to hãn ne me amjitycrĩ. Pê wa ajco caxwa me amcro kam, nee me ijàpên jicu nare, pê wa amji na jũm pê me ampo to hamrecupate. Ne nee ite ampo na me ijàhwýr to prãm nõ to nare.

⁹ Pê Jeju me imã ite itýj me jũmjê jũhkra kam me ampo cwýr xà na awjahkre. Pê wa pa, ma apu ita na mehcaca. Ampo na? Ca me ate ahna me ipupun, ne ikôat me amji ton prãmtte.

¹⁰ Pê wa curi ame acahê na me ipa reria mã, ramã me amã itajê te amji kam hapac xà ata jarê:

— He quê ha jũm mã hàpên prãm nare ne cumã xuwca na, quê ha nee hàpàn nare — hane.

¹¹ Ýhỹ, ampeaj kam ri ite me amã ijũjarên xàita, wa ite me amã ihkujahêc. Ampo na? He wa ite me acahê na jũmjê jàpên nare, ne cama ame ipane me hàpàn to ame ipa na, me harên par. Cwýrjapê wa ame amã awjarê. Ajte nee me hàpên nare, ne cama ajte ame ate amjikam me gapac xà caxun to me ipa.

¹² Ne me pajõ Pahhiti pê Jeju Crixto japrya na wa ha jũmjê itajê mã ijarkwa týtaj kujate, quê catyt kam ame ipa, ne me apê, ne amji mã me harte. Ne nee ame ate amji kam me gapac xà caxun to me ipa nare.

¹³ Ne me ca me ikjêjê, me gápênita na, ne nee me gápên kam ame apec nare.

¹⁴ Ne quê ihhêaj to jũm ma apu ite me amã ijarkwa kujahêc ita par caca na, ca ha me hahkre

pejne me cupê amji krã, ne me cupê hawry, quê ha ihtyj amehpahàm.

¹⁵ Ne nee pom ca ame acuré xwÿn to ita na ame ton nare, ne catyt kam me to amji kjê, ne me hapackre.

¹⁶ Hamre, ijõ kàhhôc cahhur mã he. Wa ha me pajõ Pahhiti wÿ, quê ha hõtpê me amã ihcarĩcti gõ, ampo itajê cunea caxuw. Ne wa ha hanea ne Pahhitina ahwÿ, quê hõtpê me acahê na apu ipa.

Pê Pawrô me cumã amji jarẽ

¹⁷ Ýhÿ, ipê Pawrô, wa ite ijũhkra ita to ihkàhhôc ita jatuj xà mã to mën. Wa ijõtpê hãn ne ijõ kàhhôc kam hãn ne ijapry nõr to hane, came ijahkre pej, nãmri ihkàhhôc ita itekjêa ri.

¹⁸ Ýhÿ, wa ha Pahpãm wÿ, quê ha me pajõ Pahhitipê Jeju Crixto me acunea mã ampo pejti jõr to ipa. Hamre.

PAHPÃM JARKWA CUPAHTI JÕ KÀHHÔC
Canela: PAHPÃM JARKWA CUPAHTI JÕ KÀHHÔC
(Portions)

copyright © 2012 Wycliffe Bible Translators, Inc.

Language: (Canela)

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 1 Oct 2024 from source files
dated 29 Jan 2022

09d4e460-c38b-52b7-81c1-8300bfeb466a